

29 MAY 2001

Mahathir-Tiba

PERDANA MENTERI TIBA DI JAKARTA UNTUK SIDANG G15

JAKARTA, 29 Mei (Bernama) -- Perdana Menteri Datuk Seri Dr Mahathir Mohamad tiba di sini, hari ini untuk menghadiri sidang kemuncak ke 11 Kumpulan 15 Negara Membangun (G15) yang bermula esok.

Dr Mahathir dan isteri Datin Seri Dr Siti Hasmah Mohd Ali tiba di Lapangan Terbang Halim Perdanakusuma pada lebih kurang 7 malam (waktu tempatan).

Menteri Luar Datuk Seri Syed Hamid Albar, Timbalan Menteri Perdagangan Antarabangsa dan Industri Datuk Kerk Choo Ting, Duta Malaysia ke Indonesia Datuk Rastam Mohd Isa dan Ketua Pengarah Unit Perancangan Ekonomi (EPU) di Jabatan Perdana Menteri Datuk Iskandar Dzakurnain Badaruddin berada di lapangan terbang itu untuk menyambut Perdana Menteri.

Dr Mahathir yang akan menyampaikan ucapan bagi pihak negara-negara Asean di sidang kemuncak itu, merupakan antara ketua-ketua negara yang tiba hari ini bagi sidang kemuncak dua hari itu di Pusat Konvensyen Jakarta.

Presiden Nigeria, Olusegun Obasanjo, Presiden Senegal, Abdoulaye Wade, Presiden Venezuela, Hugo Chavez, Perdana Menteri Mesir, Atef Ebeid dan Perdana Menteri Jamaica James Patterson merupakan antara pemimpin yang hadir dalam persidangan kali ini.

Presiden Indonesia Abdurrahman Wahid dijadual merasmikan sidang kemuncak itu yang bertema "Mengambil Kesempatan Daripada Potensi Era Digital Bagi Pembangunan".

G15 terdiri daripada Algeria, Argentina, Brazil, Chile, Colombia, India, Indonesia, Iran, Jamaica, Kenya, Malaysia, Mesir, Mexico, Nigeria, Peru, Senegal, Sri Lanka, Venezuela dan Zimbabwe.

-- BERNAMA

MKO PR